

Nowodhow an Seythen

18/03/2009

David Whalley, Konsler Livrel Werinel a-barth Bud-Strasnedh dres eth bledhen ha hembrenkyas Konsel Kernow dres peder bledhen a omdennas an 10ves a vis Meurth. Awos y vos skoodhyer krev a'n towl rag sevel konsel unys rag Kernow, Whalley re beu kosten yn fenowgh rag an re nag yns lowen gans an towl na. Kynth ywa den disputys yn bys politek Kernow, Whalley a dhenahas ev dhe vos herdhsy dhe omdenna na wrello ev shyndya chonsyow y barti y'n dewisyansow yn mis Metheven. Ev a leveris ev dhe wodhevel lies omsettyans personel dres an bledhynnyow, an pyth re beu pur gales rag y deylu, mes pan wovynnas prag y hwruga omdenna, an hembrenkyas a worthebis ev dhe wul henna drefen ev dhe vos 65 bloodh hevlana, ha drefen bos hwans dhodho a vones hag ev hwath gans tan yn y golon rag y ober. Pan wrug ev derivas ev dhe omdenna, Whalley veu praysys rag y ober avel hembrenkyas gans lies a'y gowethysi LivWer, mes yth esa lies konsler aral nag ens mar hweg. Graeme Hicks, konsler anserhek a-barth Rysrudh Soth, a leveris Whalley dhe 'asa lester ow sedhi,' ow keworra, 'Yn-dann y hembrenkyans, y teu unn terros war-lergh y gila.'

Yn nowodhow politek erel, yma an konsels ranndirel ow synsi aga diwettha kuntelesow an mis ma kyns bos deges yn sodhogel an 31ves. A'n kynsa a vis Ebryl, y fydh charjys an konsels ranndirel kemerys gans Kernow Unnik, konsel unys nowyth an Dhugeth: towl re beu kablys gans meur a Gernowyon, hag a veu degemerys gans an governans kynth o rann vrassa an poblans er y bynn, herwydh sondyansow.

Tan a worloskas 25 erow a Woon Goss yn Konteth Restormel dy' Lun. An tan a dhalathas a-dro dhe 3 eur y'n dohajyd, ha gwithysi dan dhyworth Sen Colom Veur, Sen Dennis, Ponsrys, ha Bosvenegh a dheuth dhe'n woon rag y dhifeudhi. An tir leskys yw synsys yn-dann dowlen Gonyow Kernow Kres rag mentena ha gwitha an tykki-duw breythek gwern, ehen a dykki-duw yn-dann beryl yn Breten Veur. Y'n seson ma yth yw an tykkiow-duw hwath y'ga form pryv del, hag yma own y fydh an niver a vreythegyon gwern y'n ranndir lehes hevlana dre dhiswrians rann mar vras a'ga threveth.

Yn nowodhow sport, tus an dre a fethas tus an pow y'n kesstrif hurlya Sen Colom dy' Sadorn. James Rogers, esel para an dre, a worras an bel arhans y'n gol rag gwaynya sekond (ha diwettha) kesstrif hurlya an vledhen a-barth y bara.

Hag a-barth para Nowodhow an Seythen, hemm yw oll rag lemmyn! Meur ras, ha mar pleg goslowewgh nessa sethen rag pella nowodhow dhyworth Kernow ha'n bys bras!